

健康使用互聯網 - 學生導引

影片分析

影片二：Chit-chat網絡資訊

故事大綱

研究指出青少年自我形象的建立與網絡使用行為是互相關連，網絡泛濫着色情和暴力等不良資訊，容易令青少年認知產生扭曲，把虛擬世界當作真實世界，逃避責任。透過本影片讓青少年反思個人使用網絡的行為和態度，了解《淫褻及不雅物品管制條例》的主要規管範圍及內容。

序幕

地點: 街道

角色： 社工黃SIR及女同學May

旁白

同學May：黃Sir，你睇吓我手頭上呢部平板電腦幾方便 (將平板電腦螢幕轉向黃Sir)，好快就搵齊你叫我搵嘅資料喇！(微笑)

社工黃Sir：唔該晒！係呀！依家科技發展咁迅速，我哋用智能手機或者平板電腦就可以好容易咁喺網上面搵到好多唔同嘅資訊，的確方便快捷。不過，阿May，你知唔知其實唔係所有資訊都適合兒童或者青少年觀看。好多教師同家長都留意到依家嘅青少年較以前容易接觸到不良資訊，我哋都好關注。

同學May：哦…… 真係？

社工黃Sir：係呀！不如等我俾你睇吓我輔導過嘅個案㗎。

個案一：封膠袋的寫真

《個案一》透過青少年討論有關出售時須密封包裝的刊物對話，帶出現今青少年對淫褻及不雅物品的態度，社工黃SIR講解《淫褻及不雅物品管制條例》內容，讓學生了解和懂得遵守法例，以正確的態度面對不雅品。

地點：便利店

人物：學生Henry及男同學Peter

旁白

Peter：喂！我嘅夢中情人娜娜出寫真呀，聽講話真係好正、仲好踩界，值10個LIKE啲！

Henry：有幾踩界呀？寫真集通街都係啦！

Peter：踩界到要包膠袋，淨係賣俾18歲以上嘅人士，仲賣成一百二十蚊一本！

Henry：成一百二十蚊，值唔值呀？

Peter：囉嚟睇吓！

Peter：喂，不如偷偷地拆咗個膠袋，打開嚟睇吓抵唔抵先至買，好唔好？

Henry：會唔會俾人拉㗎？……唔好啦！仲寫到明唔可以賣俾未滿18歲嘅人士！

Peter：車！係咁意睇吓，鋪頭都無損失…

Henry：做嘢要諗清楚後果先好，偷拆啲不雅刊物嘅膠袋，俾人哋知道真係唔係幾好！訓導主任知道仲可能會記過……

Peter：咁又喺，都喺唔好睇喇。

社工黃Sir：兩位青少年事後曾經問過我，點解便利店有啲刊物要包膠袋。其實現時報

章、雜誌、DVD，都係受到《淫褻及不雅物品管制條例》嘅管制。根據呢條法例，物品分為三個類別：第 I 類係既非淫褻亦非不雅，可以發布俾任何人士；第 II 類係不雅，出售時一定要密封包裝同埋貼上警告字句，而且唔可以賣俾18歲以下嘅青少年；而第 III 類係淫褻，禁止向任何人士發布。至於互聯網上嘅資訊，同樣受到條例監管㗎。

社工黃Sir：如果剛才兩位青少年偷偷拆開第II類不雅物品的封套，年紀細細就偷睇第II類不雅物品，對心智發展會做成不良影響。

同學May：原來係咁！我終於明白點解有啲刊物要密封包裝喇。

社工黃Sir：係呀，不如我哋又一齊嚟睇吓另外一個個案。

個案二：短片分享

《個案二》通過兩名學生在學校的對話，闡釋青少年對網上與友人分享色情短片的看法，讓同學理解在網上發佈色情短片有可能觸犯《淫褻及不雅物品管制條例》，最高可判罰款100萬元及監禁三年。

地點：課室

人物：學生Henry及男同學Peter

旁白

Peter：喂喂！有嘢睇！睇唔睇！睇嘅過嚟！ Henry:

又有咩嘢睇呀？

Peter：梗係好嘢啦！城中熱話，酒店關室談心偷拍短片 - 哈哈！有埋大特寫㗎！

Henry：真係！快D send過嚟啦！

Peter：你過嚟睇唔得咩？

Henry：噏！你而家send俾我，我可以再send俾啲朋友嘛！大家開心Share，如果唔係邊有話題！

Peter: 唔，都得！好朋友係要開心Share，唔係點叫朋友呀？

Henry：仲講咁多，快啲send過嚟啦！

Peter：得啦，已經post咗喺我個Blog度，自己下載啦，咁咪可以益埋籃球隊班brother囉。

Henry：咁先係㗎嘛！

社工黃Sir: 係頭先條短片入面，阿May你有冇留意到同學A干犯咗咩法例呢？

同學May：唔．．．唔知呀！

社工黃Sir：等我同你講解吓啦！根據《淫褻及不雅物品管制條例》，淫褻及不雅嘅定義包括暴力、腐化及可厭。如果响網上面發布啲色情短片，有可能觸犯《淫褻及不雅物品管制條例》，最高可以判罰款100萬元及監禁三年。

同學May：嘩，乜原來後果可以咁嚴重！

社工黃Sir：係呀！除咗唔好犯法之外，其實做乜嘢事情都應該適可而止！不如我哋再一齊睇下以下嘅個案。

個案三：網上暴力遊戲

《個案三》以母子在家的情節，講述現今青少年常沉迷網上遊戲的行為和心態，透過社工黃SIR解釋青少年活在虛擬世界中令認知產生嚴重扭曲的情況，促使年青人正視沉迷網上暴力遊戲的問題及後果。

地點： 小強家中

角色： 小強母親及小強

旁白

小強: (非常投入地玩網上遊戲) 殺死你！打爆你個頭！殺！殺！殺 (自言自語) ……

阿媽: 阿仔，食飯啦！(重覆多次)

小強: (完全冇反應) ……叫咗你咪嘈啦！食、食、食，而家死咗啦，你開心啦！(拍打 keyboard) 煩死人！

阿媽: 唔好咁躁啦！你以前都鐘意同同學踢下波打下籃球。依家？你淨係識得喺房度打機，飯又唔食，覺又唔馴。你幾耐冇同同學打過波呀？

小強: 打波都使出街嘅咩！？上網乜波都有得打啦！

阿媽: 總之今晚唔准再上網打機啦！上咁多網對健康都無益啦！你睇下你成日上網，最近去驗眼，近視又深咗！仲成日話周身骨痛！

小強: 唔打？咁我差少少就打到嗰把紅外線步槍，點算呀？你知唔知我有咗佢就可以瞄準人哋個頭嚟打啦！(以手指當槍指著媽媽) 砰！砰！砰！

阿媽: 你玩咁多暴力遊戲，啲脾氣越來越暴躁。一開口就鬧人，遲啲阿媽就被你當怪獸

或者恐怖份子咁打嚟啦！

阿仔(懊悔)：我知㗎啦……最後十五分鐘，O.K.？

阿媽：你話㗎，一言為定，十五分鐘後熄機。今晚仲要做多啲舒展運動…

小強：Yes, Mom.

社工黃Sir：頭先嘅個案，阿May你係咪覺得似曾相識呢？

同學May：唔…係呀！我識得有啲同學都係咁！

社工黃Sir：如果唔識得節制上網，就可能永遠活在虛擬世界中，脫離了真實生活。經常玩暴力血腥遊戲，亦都好容易令人不知不覺咁變得暴戾。根據《淫褻及不雅物品管制條例》，過份暴力或者血腥嘅遊戲有可能被評為第II類不雅物品甚至第III類淫褻物品，真係要請同學們多加留意啦。

同學May：完全明白了！